



J&K nem state jenjang agütsütsü  
atema bill ka agizüktsüla

Marti Cifuentes Leicester  
City manager kümogo



## Miss Universe India nung Nagaland nungi Kelülü Dawhuo tokteptsü



**Kohima, Chiteni/July 16 (TYO):** Tang Miss Universe Nagaland 2025, Kelülü Dawhuo ya state tenung nung Miss Universe India 2025 nung tokteptsü renema lir, koba National Stadium, Indore, Madhya Pradesh nung alitsü.

Lai iba tetoktepba nung shilem agitsü atema aotsü lia osangbener den jembidang, Chakhesang Naga kin nungi Kelülü-i "Goddess of Folk Song" nungja agüja aliba sübotsü agitsü ta ashi.

Lai national sapang nung Nagaland indang tashi, diversity aser sobaliba tajung sayutsü temlungtetba lir ta ashi.

Lai Naga tsür dak sempet tajung aliba lemsatep aser, "Timtem ajuruaka, asenok maneni nokdaker liyonga aotsü

tashi aser sempet asen dak keta lir," ta lai ashi.

Kelülü ya BA 2nd Year azünger aser lai shisaliok aser pageantry lirumedema bener aotsü merangba nung tayongzüka tem lemsatepa liasü. Ajisüaka kinungertem teyari nung aser mentors nungi lenmang sayuba ajanga wadang anaprong kanga junga ketdang sütettsü, ta ashi.

Lai tetsürtem dang pei mangdang sülen anidaktsü ajungshi aser 'girl child education' asoshi maneni inyakttsü aser iba Miss Universe India 2025 nung toktepba sülena tali inyakttsü sentong lir ta ashi.

Iba tetoktepba nung shilem agitsü asoshi Kelülü Dawhuo ya Brehostibarnü aotsü.

## Kohima nung 'Serve Safe Food' project tenzükogo

**Kohima, Chiteni/July 16 (TYO):** Nagaland state yimtiba nung aliba yimtung nung chiyongtsü müreka amshidaktsütsü asoshi tongtipang mera ka agia tanü street vendors atema 'Serve Safe Food' training ka tenzükogo.

Iba ya Nestle India Limited teyari nung Department of Food Safety, FoSTaC, aser National Association of Street Vendors of India (NASVI) den lungjemer ayongzüker.

Sentong nung jembidang, Kohima Municipal Councilor Keneisezo Kera-i iba sentong asoshi tenüngsang agütsü aser Nestle India aser Department of Food Safety ajanga 'grassroots food workers' nem shisatsü tajung agütsütsü asoshi lungjemba atema pelaba lemsatepa liasü.

"Asen street food vendors ya tayoker kisung masü, parnok ya local entrepreneurs lir, koba urban economy asoshi kanga tongtipang lir. Saka aintsü asoshi teinyakttsü lir - chiyongtsü tajung aser temürek agütsütsü ya kanga tongtipang lir," ta pai ashi.

Food safety ya sorkar indang ozüing ka kisung masü saka ner customers, ner kibong aser nü temang anema alitsü asoshi temeim aser akumtsübo sayuba lir, ta Kera-i ashi.

Kera-isa Kohima Municipal Council nungi maneni yaritsü ta ashi aser, "Nenok ya aser yimti-yimtung tejak lir. Nenoki agütsüba chiyongtsü ajanga nenok mapa tajung sayuang. Chiyongtsü tajung agütsüti aser Kohima tajungba kumdaktsüti," ta pai ashi.

Iba training ya FoSTaC (Food Safety Training and Certification) kübok street food vendors nem mürekmejutsüba, chiyongtsü tem kumzüka amshitsüba aser business tuluba kumdaktsütsü yimya tem angazükdaktsütsü nükjidong nung ayongzüka lir.

Iba sentong nung State Program Officer FSSAI, Dr John Kemp; Designated Officer FSSAI Kohima Zone, Kezha Yim; Assistant FSC, C Merenlemba aser Head Street Food Program, NASVI Sangeeta Singh nungeria jembia liasü.

## Nagaland nung July 23 tashi tzünglu maneni arutsü: NSDMA

**Dimapur, Chiteni/July 16 (TYO):** Nagaland State Disaster Management Authority (NSDMA) ajanga July 16 nungi tenzüka July 23, 2025 tashi, anogo ti asoshi tzüngsang-mopung takzüba osang metetdaktsü.

July 23, 2025 tashi district ajunga nung tzünglu yimya balala nung arutsü ta ashi.

July 16-21, 2025 tsüingta Mon, Tseminyu, Niuland, Dimapur aser Kohima district tem nung tzünglu tesashi den tsüing-tsüingperet dener arutsü imlar.

Tanüngba district tem nung tzünglu tera arutsü aser takzüba mapang taliba akumtsü.

Anungji tsüing aiba aser mopung tesashi aonba nungi jenbua alitsü nüngdak, aser iba mapang osangtsüsang agitepba aser tesendaktep nung timtem ajurutsü akok. Tenemlen tzünglu kanga sashia arutsü ama takzüteta aliba mechi Dimapur,

Niuland, Chümoukedima, Bhandari, Baghty, Tizit aser Tuli densema lenden aser tenemtsüing nung aliba district tem nung tzü metsüingtsü aser ajungben tzümetsüing adoktsü akok, ta NSDMA sangdong ajanga ashi.

Iba yongji lenden nung aliba district tem dang tang tzümetsüing tensa mechi item mera ya agitsü ayongzüko:

1. Tongtipang documents aser osettsüset tem mesamatsü aser meraksatsü atema safe locker nung ayutsüla.
2. Ketdangsür temi shira, telemok tesemtem nungi ainshitsüla.
3. Gas leak atema tenük zünga alitsüla.
4. Tzümetsüing agi kongshir aliba chiyongtsü machitsüla.
5. Tzümetsüing adoka alidaki maotsüla mesüra tzü metsüing aliba ajanga gari anir maotsüla.

6. Electrical oset tem disconnect sür ali nungi terabo ajungketa ayutsüla.

7. Tzü majem dang muluang mesüra chlorinated water amshiang.

8. Open drain holes mesüra flood channels meteta alitsüla.

NSDMA ajanga nüburtem dang iba mapang kanga kumdanga alitsü aser ajungben lendong nungi jenbua alitsü ayongzüko.

NSDMA, Home Deparetment ajanga District Disaster Management Authorities aser danga line department tem dang nisung takum aser ki o jen kumzüka ayutsü asoshi saksalema alitsü metetdaktsüogo.

Ajungben koda masü timtem mesüra lendong-tsüdong mapang State Emergency Operation Centre (SEOC) Toll Free 1070 ajanga jembitsü akok.

## Kohima DC-i NH-29 nung gari tulutema mesenzüi atatsü metetdaktsür

**Dimapur, Chiteni/July 16 (TYO):** Deputy Commissioner, Kohima, B Henok Buchem, NCS ajanga July 7, 2025 nü totuyuba agüja aliba den medenloksema, National Highway-29 nung Chainages: KM 175.100 & KM 175.350

(old KMC dumping site anasa) tesem balala nung alinen alua aliba mechi tarutsü nung totuyuba ka magütsü tashi iba lenmang nung gari tulu mesenzüi alitsü metetdaktsüogo.

Anungji tang nungi tenzüka heavy vehicles (six wheelers) tem

Peducha Bridge - Tsiesema (10 Mile) road nung taoba mapang tuyua aliba ama senzütsü.

Kasa mapang danga district temi aiba LMVs tem kasa Peducha Bridge - Tsiesema (10 Mile) ajanga senzütsü ayongzüker, ta metetdaktsü.

## Himanta Biswa Sarma-i Assam rongsen Adani, Ambani nem agütsür: Rahul Gandhi

**Guwahati, Chiteni/July 16 (Agencies):** Bodhbarnü Congress lenir Rahul Gandhi-i Assam Chief Minister Himanta Biswa Sarma kanga sashia aitsü aser pa "chuba" ama yimya amshia state indang ali aser rongsen tem Adani aser Ambani ama corporate tulu nem agütsür ta ashi.

Chaygaon nung party workers

tem den jembidang, Assam nüburtem ochi aser tangatetba shidak nung nokdaka lir sernung mashi lenmangi anisar aser telemsa adokdaktsür, ta Rahul Gandhi-i ashi.

Assam indang ali rongsen pei ajangzükttsü nükjidong nung meshidaki amshiba, authoritarian leadership aser kin telemsa adokdaktsüba kasa

linük nunga lir, ta pai ashi.

Congress party ya democracy kumzüka ayur ka lir aser ochi, ajak kasa aser nübur temeden asoshi maneni raratsü, ta Gandhi-i ashi.

2026 Assam Assembly elections atema grassroots tashi itshitsü merangba nung shilem ka ama pai Congress tir den külemi Assam semdang.



All Nagaland School Teachers' Association (ANSTA) pur shisadokden senden ka July 16, 2025 nü Morung Conference Hall, Directorate of School Education, Kohima nung mena liasü. Senden nung All Nagaland Ad-hoc Teachers' Group, All Nagaland Government Primary Teachers' Association, All Nagaland Hindi Teachers' Union, All Nagaland Hindi Teachers' Union CSS, Nagaland RMSA Teachers' Association 2016, All Nagaland Education (T-PIMS) Employees' Group, RMSA 111 Graduate Teachers 2016, SSA 2013 Backlog (Maths & Science), All Nagaland Drawing Teachers' Group, All Nagaland Graduate Teachers' Forum aser Vishesh Gyaan Hindi Teachers nungi osang agitepa parnoki timtem balala ajuruba lemsatepa liasü.

## KVK Dimapur nung hands on training ka agi



**Dimapur, Chiteni/July 16 (TYO):** ICAR-KVK Dimapur-i ayongzüka KVK Dimapur nung value addition of pineapple dak sendakba nung Hands On Training ka agiogo. Iba sentong ya Dr. Chingakham Sima Chanu, Subject Matter Specialist, Home Science, KVK Dimapur aser Green Hills Research & Development, Chumukedima nati achaayanga agia liasü.

Sentong ya jiru RTS Beverage, jiru squash aser jiru jam yanglutsüba sayua tenzüka liasü.

Senior Scientist Cum Head, KVK Dimapur Dr. Phool Kumari-i, aluyimertem dang jiru processing dak sendakba nung parnok tasa ajungketshitsü ajungshi, ajita asünungdang juri

shizüka meyoki takok tashi amshitetsü aser aluyimertemi sen timba aazüktetsü, ta ashi.

Kasa mapang nung Green Hills Research and Development ngutetsang aser mendenbuba Masabenba-i, aluyimertem dang KVK Dimapur nung angazükbatem bener tejakdangi aotsü ajungshi, ajita asünungdang aluyimertemi alu nung adokba jirutem amshia parnok indang food processing outlet tem lapoktetsü, ta ashi.

Paisa, food processing dak sendakba nung aluyimertem tasa aser shisatsü arangtetshitsütsü atema iba amala skill development training sentongtem ya mapang shia ayongzüka agitsü nüngdakba lemsatepa liasü.

Subject Matter Specialist, Plant Breeding, KVK Dimapur Dr. Bendangla Imsong-ia, aluyimertem dang tarutsü nung iba amala maongkatem ya agitsü ajungshi, ajita asünungdang food processing dak sendakba nung parnok tasatem arangtetshitetsü aser aluyimertem senotsü timba aazüktetsü atema lenmang lapoktsütsü, ta ashi.

Ajak senteper aluyimer 30-i training sentong nung shilem agi. Sentong nungsa Dr. Ebibeni aser Dr. Moanaro na densema KVK Staff temia shilem agia liasü. Hands On Training sentong ajanga aluyimertem entrepreneurship terenlok atema parnok tasa arangtetshitsü ajungmesor.

## ARO Rangapahar-i ayongzüka outreach sentong agi



**Dimapur, Chiteni/July 16 (TYO):** Army Recruitment Office (ARO), Rangapahar-i ayongzüka Indian Army nung nüburtem tali züngoksemdaktsütsü atema Nagaland nung July 14 aser 15 nü Carvaan Talkies ajanga outreach sentong ka ayongzüka agiogo.

Iba sentong ya Assam Rifles den longjemer Higher Secondary School, Mount Moriah School, Mokokchung aser Jubilee Memorial College, Canaan Christian Higher Secondary School, Mokokchung nung agi, kong kaketshir 300 shi-i shilem agia liasü.

Sentong nung kaketshirtem aser lanurtem

atema "Join Indian Army as Agniveer" ta nüngja agütsür video ka sayua liasü. Video ya entries balala atema eligibility criteria, training inyakyim, libaliro jenjang aser physical fitness dak rangloker yangluba video ka liasü. Agniveer ama Indian Army nung adentsü atema eligibility criteria aser NDA ajanga Army nung adentsü asoshi inyakyimtem flex board tem ajanga sayua liasü. Kasaji ARO nungi ketdangsürtemi kaketshirtem dang rasa shia liasü.

Kasa mapang nung Agniveer ama Indian Army nung adentsü atema registration assistance

counter ka amenokja liasü. ARO nungi ketdangsürtemi registration inyakyim indang kaketshirtem nem metetdaktsü, kong registration atema kuli kakettem nüngdakba indang metetdaktsüba densema liasü. Campaign nung shilem ka ama kaketshirtem nem shilem agidaktsütsü asoshi Magnet Dart Board game ka asaya liasü.

Maneni sentong nung Indian army indang official website logo aketba Posters, T-shirts, caps aser wristband tem kaketshir/lanurtem nem lemja liasü. Sentong nungsa kaketshirtem dang war movie ka sayua liasü.

## IAF-i recruitment atema metetdaktsü

**Dimapur, Chiteni/July 16 (TYO):** Indian Air Force (IAF)-i sangdong ka ajanga, Airmen Cadre nung Agniveervayu Intake aser Medical Assistant ama shimtsü asoshi online application tem jaokogo aser teküboklen agüja aliba websites nung osang tejanga angutsü.

Agniveervayu (Science & Science subjects masübatem) atema online registration ya July 11 nü 11 ako nungi tenzüko

asir July 31 nü 2300 hour nung shibangtsü. Registration atema <https://agnipathvayu.cdac.in> semdangtsü metetdaktsüogo.

Airmen (Group 'Y') Medical Assistant trade atema online registration July 11 nü 1100 hr nungi tenzüko aser July 31 nü 2300 hr nung tembangtsü. Airmen Cadre nung Medical Assistant ama züngoksemttsü atema (tebur dang) registration agitsü asoshi [www.airmenselection.cdac.in](http://www.airmenselection.cdac.in)

## IT & C-i ayongzüka 'Digi Locker' workshop agitsü

**Dimapur, Chiteni/July 16 (TYO):** Department of Information Technology & Communication-i sangdong ka ajanga, National e-Governance Division (NeGD), Ministry of Electronics & IT, Government of India aser Department of Information Technology and Communication na longjemer 'Digi Locker (User Experience for Government Application)' & 'eProcurement and eTendering System' dak sendakba nung workshop ka agitsü ta metetdaktsüogo.

Iba workshop ya July 18 nü 9:30 ako nungi tenzüka Directorate of Information Technology & Communication, Kohima conference hall nung agitsü.

Iba workshop ayongzüka

agiba nükjidongji, secure digital document wallet ka agüja, authentic digital documents aser certificates source nungi indang indanga agüja lisopurtem digitally empower sütsütsü atema lir.

Iba ajanga tangazükba agütsüba den digital transformation sentong ka chart sütsütsü aser procurement inyakyim streamline aser automate sütsütsü, koba ajanga goods aser services alizükba mapang inyakyim tedangshiba kümdaktsüba den senotsü kümzükttsü aser ochishia inyaksangshitetsü.

Departments ajak dang workshop nung adentsü atema Directorate nungi ketdangsür tejen kaka shimer yoktsü mepeshia metetdaktsüogo.

## Pfutsero nung Phek DPDB senden menogo

**Dimapur, Chiteni/July 16 (TYO):** July ita atema Phek DPDB senden July 14 nü Advisor, CAWD & Taxes, Kudecho Khamo lenisüba nung Pfutsero ADC Office nung menogo.

Senden nung Deputy Commissioner aser Vice Chairman, DPDB, Rhosietho Ngouri, NCS-i züngsem tasentem pelashishia agizük aser iba sülen parnok metetpela sentong agia liasü.

Senden nung o jembiba mapang Khamo-i, June ita DPDB senden nung ita shia merekmeju sentong

ayongzüka agitsü atema lemtetba ama July 5 aser 12 nü Phek aser Pfutsero nung merekmeju sentong ayongzüka agiba atema District Administration nem tenünsang agütsü. Paisa, Phek district kübok yimtsüng aser jila ajak nung itashia merekmeju sentong ayongzüka agitsü atema benokdanga liasü.

Maneni Khamo-i, India nung Civilian Award tematiba; Padmashri Award agizükba atema Sano Vamuzo nem tenünsang agütsü

Kasa mapang nung MLA, Dr. Neisatuo Mero-i, Pfutsero nung mezüngbuba Phek DPDB senden amentsü atema maongka agütsüba atema Phek DPDB Chairman

Kudecho Khamo dang kanga pelaba lemsatep. Paisa, District Administration aser Pfutsero Town Council dang, kilentsü nung jana mintoktsü atema nüburtem nem tangazükba agütsütsü mepeshia liasü.

Senden nung taoba senden minutes lepa repringshi aser Phek Town nungi Elpis Society aser Kikuma yimtsüng nungi Kuvetho Society züngoksemttsü atema sensaksema liasü. Ken o sensak asema sülen house-i ketdangsürtem dangi abentsü telemtetba agia liasü.

Maneni Pfutsero jila lenmang yanglushitsüba indang jembiba mapang MLA, Dr. Neisatuo Mero-i, jila lenmang yanglushitsü atema scheme ya sorkar dangi benogo, ta ashi.

Board-isa, Phek district atema Local Area Development Program (LADP) 2025-2026 kübok scheme tem agizükogo, koba Deputy Commissioner & Vice Chairman DPDB, Phek-i benoka liasü. Senden nungsa Executive Engineer, Power, Er. A. Ritachu Thurr-i, PowerPoint presentations ka ajanga department inyakyim indang metetdaktsü aser DFO, Phek, R. Esther Angami-ia, Fishery department indang inyakyim metetdakja liasü.

# Hadir tejen agi takok mangutsü: CDS



July 16, 2025 nü New Delhi nung Army temi ayongzükb workshop den exhibition sentong ka nung Chief of Defence Staff, General Anil Chauhan-i exhibition repranga senzüdang tangokba noksa nung angur.

**New Delhi, Chiteni/July 16 (Agencies):** Bodhbarnü Chief of Defence Staff (CDS), General Anil Chauhan-i, tanü putu mapang tongbang rara nung India-i hadir tejen amshiba agibo takok mangutsü, ta metetdaksü.

India-i tarutsü tongbang rara atema technology tasen amshitsüla, talisa linük nung raraba hadir tajung yanglutsü atema rangloker inyaksüla, ta pai ashi.

CDS, Chauhan-isa 'Operation Sindoor' mapang nung India-i Pakistan nung drones den hadir balala nokdangtetba metetdaksü.

Delhi nung defence workshop ka nung jembidang Chauhan-i, "Operation Sindoor mapang nung May 10 nü Pakistan-i unarmed drones aser suicide drones aika amshia liasü. Item jagi India nunger sepaitem mesüra civilian kiojen kecha meraksatsütet. Itemji teimbaka nokdangteta liasü, ano karbo kecha meraksai angu," ta metetdaksü.

"Yashi (akhi) hadirtem ajanga tanü rara nung takok mangutsü, tanü putu nung tongbang rara akoktsü atema tarutsü technology nungdaker," ta pai ashi.

"Asenok missions atema

bendanger technology nung memetaloktsüla; bendanger technology nung metalokba ajanga terenemshiba tashi meitdaksür," ta pai ashi.

April ita nung Pakistan nungi kiralongrartemi Pahalgam amakba sülen India sepaitemi Operation Sindoor kübok Pakistan aser Pakistan-occupied Jammu and Kashmir (PoJK) nung kiralongrar camp 9 amak. India-i Pakistan nung airbase-a aika amak.

Unmanned Aerial Vehicles (UAVs) ya kanga tongtibang aser drone technologies atema linük nung technology nungdak, ta shia Chauhan-i, "Kodang asenoki drone indang jembidir, nai-a ibaji kechi ta bilemer. Drone terenlok ya melenshia dang alir. Rara mapang nung drone amshiba kanga nungdak ta meteta army temi drones ya melenshia amshir. Asenoki rara balala nung ibaji nguogo," ta ashi.

Chauhan-isa, "Melenshia aruba ajanga hadir aser raraba osettem tilaba, tekeraba, tepungbaba aser jenjang dalangba küma arur. Asenok ket nung prangpong taret liasü, saka tangbo prangpong tatsüka dang, tepungbaba saka meta talangba khateter. Ajioda tanks aser tayimtsüa tangbo tepungbaba aser tekeraba kümogo," ta ashi.

# Hombar nungi tzüngluruwa mongpu Parliament senden tenzüktsü

**New Delhi, Chiteni/July 16 (Agencies):** Hombar nungi tzüngluruwa mongpu Parliament tenzüktsü aser sorkari iba senden nung bill 8 benoktsü tebilemba lir.

Sorkari National Sports Governance Bill, Geoheritage Sites and Geo-relics (Preservation and Maintenance) Bill, Mines and Minerals (Development and Regulation) Amendment Bill aser National Anti-Doping (Amendment) Bill benoktsü.

Tanüngba Bill pezüji Manipur Goods and Services Tax (Amendment) Bill, Jan Vishwas (Amendment of Provisions) Bill, Indian Institute of Management (Amendment) Bill aser Taxation Laws (Amendment) Bill lir.

Parliament senden July 21 nungi tenzüktsü aser August 21 nü tembangtsü. Lok Sabha aser Rajya Sabha naprongla nung senden ajak senteper 21 alitsü.

Ajisüaka Raksha Bhandan anogomong aser Independence Day anogomong sentong aliba ajanga August 12 nungi August 18 tashi senden thina atatsü.

Taruba Parliament senden nung onük aika nung ruling Bharatiya Janata Party (BJP) aser Congress-i aniba opposition INDIA teloktep na

tsüngda o enteptsü. Talisa Parliament nung Election Commission-i Bihar assembly election atema benokba Special Intensive Revision (SIR) onük nung o enteptsüa akok.

Opposition-isa Operation Sindoor aser US Tir Donald Trump-i, pai tiyongtsüi ia inyakba ajanga Pakistan aser India na tsüngda nuclear rara nokdangtet, ta jembiba o atema sorkar dang nungi telangzüba meshitsüa akok.

Tan mongpu senden nungsa sorkari Income Tax Bill, 2025 benoktsüa akok. Taküm February ita nung iba Bill ya Lok Sabha nung benoka liasü, iba sülen iba bill reprangshitsü atema Select Committee ka nem agütsü. Bodhbarnü committee jagi iba report ji agütsüogo aser Hombar nung Parliament nung iba report ji benoktsü.

Sorkarisa Manipur nung President's Rule atsülangtsü atema benoktsü.

Tang Lok Sabha nung anendaka aliba bill tem rongnung Readjustment of Representation of Scheduled Tribes in Assembly Constituencies of State of Goa Bill, 2024, Merchant Shipping Bill, 2024 aser Indian Ports Bill, 2025 lir.

# J&K nem state jenjang agütsütsü atema bill ka agizüktsüla: Congress

**New Delhi, July 16 (Agencies):** Bodhbarnü Congress MP aser Leader of Opposition (LoP), Rahul Gandhi aser Congress Tir, Mallikarjun Kharge nati Ato kilonser, Narendra Modi dang Jammu & Kashmir nem state jenjang agütsütsü aser Union Territory of Ladakh ya India temzüng kübok Sixth Schedule nung züngoktsü atema taruba Parliament senden nung ozüng ka benokang, ta mepishia metetdaksü.

July 21 nü Parliament senden tenzüktsü lia Rahul Gandhi aser Kharge nati külem shidi ka ajanga Ato kilonser Modi dang, tesüba mapangtem nung state ka agi jenjang tajemba kümdakja Union Territory kümdaksüba mali, ta metetdaksü.

Congress-i Ladakh Union Territory ya India temzüng kübok sixth schedule nung züngoktsü mepishi. Ladakh nung nüburtemi mapang talangka nungi lisopurtem ali aser mapa temeden kümzüksü atema iba takhangba ya agüja arur.

Ladakh nung lenirtemi ashiba agi, Ladakh ya Sixth Schedule nung züngokra parnoki lisopur masüba

nisungtem nem mapa agütsüba mesüra ali kiojen ayokba dak sendakba nung parnok sasa ozüng yanglutettsü.

Congress-i shidi ajanga Ato kilonser Modi dang, "Union Territory of Jammu & Kashmir nem state jenjang agütsütsü atema onoki sorkar dang taruba tzüngluruwa mongpu Parliament nung ozüng ka agizüktsü mepishir. Iba dak alia onoki sorkar dang Union Territory of Ladakh ya linük temzüng kübok Sixth Schedule nung züngoktsü atema ozüng ka agizüktsü mepishir," ta metetdaksü.

Congress-i iba takhangba agütsüba atema J&K nung ruling National Conference aser J&K Congress lenirtemi pelaba metetdaksü.

NC otongdar, Imran Nabi Dar-i, "Jammu & Kashmir nem state jenjang agütsütsü atema Parliament nung bill ka agizüktsü onoki imlar. Ato kilonseri, mezüngbuba nung delimitation alitsü, iba sülen election agitsü, iba sülen Jammu and Kashmir nem state jenjang agütsütsü ta nangzüka lir. Nüburtem dang nangzüka ya mapa küma inyaksü onoki imlar," ta metetdaksü.

# India-i tang mezüng US nungi Apache Attack Helicopter angutsü

**New Delhi, July 16 (Agencies):** India-i mapang talangka nungi yongyaa aliba Apache attack helicopters July 21 nü US ket nungi angutsü.

Iba helicopter dang 'Tanks in the air' taka ajar. Iba helicopter ajanga India sepaitem ano jenjang tajungba akümtsü.

AH-64Es advanced attack helicopters ji July 21 nü Indian Air Force (IAF) Hindon Air Force Station atongtsü aser item helicopters ya Pakistan den arrtsülen amshitsü, ta defence osang ka ajanga metetdaksü.

Indian Army-i mezüngbuba Apache attack helicopter

squadron ji Pakistan den arrtsülen Jodhpur nung aliba lisem lima sector nung amshi. Iba squadron ya 2024 küm March 15 nü Jodhpur nung Director General Indian Army Aviation Lt Gen Ajay Suri-i tenzükja liasü.

Tang Dhruv aser Chetak ama utility helicopters ji Army Aviation Corps-i amshir. Tang Indian Air Force (IAF) ket nung Apache helicopters 22 lir aser itemji anüdoklen arrtsü aser anüolen arrtsü nung amshir.

Ministry of Defense-i ashiba agi, Apache helicopters jagi alilen amokmeren liaka tsükchirtem airspace nunga rarateter. Iba

helicopters yagi data networking ajanga tongbang raraba tesem noksa yokteter aser agizükter, aser ibaji ajanga iba helicopter ya hadir tesashi ta züngshir. Iba helicopter nung air-to-ground Hellfire missiles, 70 mm Hydra rockets aser air-to-air Stinger missiles densema raraba hadir aika benteter. Apache helicopter nungsa 30 mm chain prangpong den injang 1200 lir.

Iba helicopter ya anepdang-aonung aser tsüngsang mopung balala ajak nung amshiteter, iba denji külemi lisem lima densema region balala nung mapang talanglang amshiteter.

## GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA

Website: [www.highereducation.nagaland.gov.in](http://www.highereducation.nagaland.gov.in) Email: [dir.highedu@gmail.com](mailto:dir.highedu@gmail.com)

NO.HED/SCHO/MERIT-R/2023-24/929

Kohima, dated 16th July, 2025

## INFORMATION FOR STATE MERIT & RESEARCH SCHOLARSHIP FOR THE ACADEMIC YEAR 2025-2026.

This is to inform all the applicants of State Merit Scholarship studying outside the state of Nagaland and to all the Research scholars(both within and outside the state) for the Academic Year 2025-26 that the last date for submission of hard copies(print out of the online submitted form along with the required documents)via speed post/hand post to the Scholarship Section, Directorate of Higher Education, Below New Secretariat Complex, Nagaland, Kohima-797001, is on 15th November, 2025 after which no submission will be entertained. Incomplete/ wrong entries in the e-form or incomplete enclosure of necessary documents will be subjected to rejection.

Sd/-  
(V. LOVITOLY SEMA), NCS  
Ex-officio Director  
Higher Education  
Nagaland: Kohima.



## TIR YIMYIM YIMOBILEM (EDITORIAL)

DIMAPUR

YANGTEPNÜ

CHITENI 17, 2025

### Tapayutsü ali tazüng

**T**angar lima apibo asenok asoshi Ao lima aser Naga nungir ajak asoshi Nagaland ya alinük tilaka dang lir saka ano kodang asenok nüksüng ya tangar lima nung aliba nüksüng yongsük den medemdangdir, asenok nüksüng yabo kanga ishika dang lir. Aji oda, yimten tsütsüa tanga state-tem nungbo Nagaland state rangben dang nungi kanga agia tuluba Parliamentary constituency-tem lir. Item rongnungji, Andhra Pradesh nung Malkajgiri constituency nung nüksüng yongsük masü voters lakh 29 dak tali lir, ano Uttar Pradesh nung Ghaziabad constituency nunga voters lakh 23 jungnüa lir aser Karnataka nunga Bangalore North constituency nung voters lakh 22 dak tali lir. Item denji kodang asenok medemdangdir asenokbo voters masü nüksüng yongsük tsümar dena lakh 20 shi dang sükdangteter. Aji oda, kodang asenok akaba alushi tilaka ya asenok nüksüng yongsük agi lemdir, asenok nisung shia alu tululu yimtettsüsa ali agi atatsü. Ibaji angatetsü atema asenok nisung shia pei yimtsüng lir, anungji pei yimer nüksüng yongsük agi pei yimer lushi lemdi ser alem nunga nisung shia alu ayimtsüsa alumang tululu atatsü. Ibayongji, tangaribo asenok ya takar a ta züngshir. Ashiko, iba jagi asenok dak tazüng temetetba tuluka meliaka aser senpong nung sen rezünga makaaka, ali kibur, ali malik, asüba agi tüzumartemi asenok ajak dang sahib aser memsahibta ajar südi, kechiyong ali makar tsümartem asoshi ali kiburtemji alima tsüngremtem lir. Ajisüaka, asenoki asen akaba ali aser alushi ya rongsen amai mezüngshir, anungji shitakba nungbo Tsüngremi takar kümmer alimai yok ser nung asenoki asenoksasa sensaker amai bilemer, anungji sensaka alir, kechiyong nisung kati pa mesüra laji kechi ama bilemdir, pa mesüra laji yamaji akümer. Aji oda, asenok dak tamashi ka alibaji, asenoki ali masü sen cash-ang rongsen amai bilemer aser ano kangasa tamashi kaji ali nungi sen züsenter ta asenoki tebilema mebilemer, anungji asen nükla nung ali nung züsenterba agi sen kuma mangur. Ashiko, iba jagi aluyimtsü mejangrar südi, anungji asenok aika government mapa mengura paralyse asüba ama kecha meinyak kidang amonger. Ibayongji, asenok ali malik-tem tapayutsüka asenok yimtak asen li tazüng, kecha tsünüa mali, yangji farm akümtsü tebilema mebilem takar agi meshimetsür kmer alir. Tanü puru nung tangarbo yimdong nung janaona bendena aji agi sen kuma rongsen yangludang, asenokbo rongsen agi janarüjaa memeyong kümdaktsür. Aji oda, anogo shia asenok ajaki aonsutsü lu ayim nung junger, jenjang aketba süngdong atem nung junger aser kiset shiruru metsüba mapa yaa tajangzük aketba mapa ta jembia amonger saka shiangaia mapa kuma meinyaker. Asenok sensakbaji makaba aser meinyaktetba agi masü saka asenok jembiba o agi mapa kuma meinyakba ajanga lir, anungji tanübo asenok o agi mapa akümtsüla. Aji oda, o kisung jembiba agibo computer aser mobile phone- a meyanglutetsü. Itemji bilemdanga, tanübo asenoki asen li ya tazüng meyutsü alu ayim tenzükdi. Asenoki angatetsüba tongtibang kaji, asenok aika Dimapur aser Kohima nung senso kuma alir, aji asenok ajak asoshi takok tuluka lir. Ajisüaka, Kohima aser Dimapur nung alirtem ya, kar dak alaka, teimbaka pei aliba ali kimong dak alaka alu ayimtsüsabo Kohima aser Dimapur nung ali maka saka nisung ajakji pei pei tsürabur yimtakbo pei kija lu, kinunger lu, kidong lu aser yim lu tululu akatsü. Anungji, item lutemji, atangji tzu mopong ajungtsü atema, tesem karbo arem wazüka ayutsüla aser tanüngba alu mangtem ajunga nungji ali dak apet alu ayim tenzüksüla. Aji oda, asen lima ya tenem lima asünungji, industry tulu melapoktettsüa akok aser aji asenok tia aka, kechiyong iba jagi tzu mopong memenentsü, anungji asenok asoshi tajangzük lia inyaktettsübaji 'Farming' ya asütsü. Ibaji asenok tangatetba aser temulungtetba nükla nung yur asenok kari aonsutsü lu, kari süngjang lu, süngo aser coffee lu, kozü aser konger lu, rubber lur, aghar lu, sandalwood lu ta yimdir aser ano kari ak an, kari nashi nabong aser kari ango aser ninang ta metsü tenzükdir, shitakba Canaan farming aser Canaan limaji aji asütsü. Idangjiang, ali tazüngji mamatzü aser ninang mojitsü agi asüngtsü.

## OLEMSABANG

### Sarasadem tesep koma asünung tajungba süla

Limatula Longkumer

#### Okila

Iba ocet nung Prayer Centre indang nung kü tebilemba kar lemsateper. Prayer centre, sarasadem tesep melentepa dang iba ocet nung amshir. Engraji o-a aika inoksema zülur, iba atema tazünger mejashitsü mepishir. Ajak ajungtsü nükjidong nung prayer centre aser arogo inyakyim medemdanga teyanglushitsü tebilemba kar yangi zülur. Iba onük nung asen lima prayer centre koma inyaka aor iba indangji kü shisatsü yari tongmelang agi tatsüka zülur. Yangi zülua aliba yagi prayer centre shinga maitsür, saka yimkong inyakyim (general) ajitetba nung kü tangatetba yari zülur.



#### Sarasadem aser tamang yimsü

Arogo otsütem lepa reprangra, sarasadem sep (prayer centre) ya tanü asen putu nung ajungbena poktetba ka masü, saka arogo tetenzük nungi tenteta aruba yimya ka lir. Tat. agi, Yisu Gathsemane atsüki nung sarasademba (Mat. 26; Mk. 14), Yisu kotaki meyipa tur, nüksüngtem Yirusalemi arur sarasademba (T.Mapa 1). Tejen Lai nunga lumia sarasademba otsü aika zülua lir. Anungji sarasadem ya Khristan yimsü nung teti inyakba mapa ka lir. Sarasadem nung ain lir, sarasademi ajak akoker aser iba tashi ajanga tamangtir ka kümdaktsür. Saka Laishiba nung lumia sarasadem asübaji arogo telungjem kübok inyaka aru. Alima nung aliba tamangba yimsütem balala reprangdangra, sarasadem aser lumiba ya yimsü ajak nung lir. Hinduism, Islam, Buddhism, yamala ajak nung lumia sarasadem yimya tajung aika sayur aser benschia arur. Talisa Muslim nungeri küm nung ita ka lumir. Iba yagi sayur, asenok kechi koda lidir liang, tatem nungbo meimchir ajaki Tsüngrem dak atemer. Takar-tulur, sensaker-tilar, tanur-tain ajaki timtem toudhi, shisabulu khuret ajak nung Tsüngrem bushir, aser taneptsü bushia Tsüngrem dangi meyiper. Lumia sarasademba ajanga tanela aser shi nung temoatsü, aser anisüngzük tepela angur. Anungji sarasademji meimchir ajak asoshi tongtibang yinzü ka kobai teyanglur Tsüngrem den tesentaktep adokdaktsür; aser iba jagi meimchir madak temaba teyanglur Tsüngrem ka lir aser Pa ajanga asenok alir ta angateter.

#### Sarasadem Sep ya Pentecostal telok nung adokba mapa ka

Tanü asen lima nung sarasadem tesep lapoka aoba ya "Neo- Pentecostal- Charismatic Movement" nungi adokba süngjang lir ta metetdi. Iba movement ya 1960s, 70s nungi tenzuka alima aika nung sashia odaki. Iba sarasadem tesep ya asen lima nung dang masü, saka alima ajak nung kong revival sashia adoker, yangji sarasadem tesep tenteta aobaji angutsü. Africa lima nunga asen lima nung adokba amai sarasadem tesep aika adoka odaki, kasaji Asia lima nunga tesem aika nung sarasadem tesep adokba angutsü. Iba ya 19th aser 20th centuries nung adokba charismatic movement dang nungi balaka lir. Iba Neo-Pentecostalism nung tongtibang asem arogo nung atalokba angutsü.

**Itemji :** (i) establishment of independent charismatic churches; (ii) charismatic transdenominational fellowships; and (iii) charismatic renewal groups within historic mission denominations. Asen lima nung sarasadem tesep nungji temalen shisema aliba number ana (2) aser asemji (3) inyakdaki aser number kaji (1) joko Dimapur town nungbo tenzuka meilongi odaki. Item sarasadem tesep nungji kecha tenokdangba makai kobai onüdir aotsü akoker.

Denomination balala telemsa and tetoktepba kecha sarasadem tesep nung madoker. Mesüra par kin, ozü kin-i lapokba ta telemsa kecha mali. Na asoshi koba tajungba ta südir mashi kati aotsü aser mashi mapang nung aotsü akoker, kechiaser 24x7 prayer centre lapoka alir. Tanabuba nung, prayer centre-tem ya tangar denomination kar arua tenzükba masü, asen nisungtem shirnok arogo nung züngsem tajungtem lir, parnoki tenzükba asünungji iba ya arogo nung asentenshi adokdaktsür telok ka amai lir. Saka item sarasadem tesep teloktemji jungjunga reprangdangra, independent fellowship ama kuma odaki. Arogo nung asentenshi jangrar teloki lapoka aoba teseptem lir anungji shiangaia nokdangtsü makok. Saka tanü amai dang prayer centre inyakyim ya inyakyonga aonungbo, ashiko mekümdangra iba yagi independent arogo kümteta aotsü ana nung dang lir. Anungji iba indang ya junga shisadangtsü mapang ka tongogo.

**(Maneni asüng adok nung...)**

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

ABAM-i Ao senden aser Tongror Luden den sensaksem



**Impur, Chiteni/July 16 (TYO):** ABAM Sanen Luden aser Ao Senden Kütdangpur aser Tongror Luden telungjem sensaksem tajung ka July) 15, 2025 nü Ao Senden conference hall nung agia liasü, ta ABAM Executive Secretary, Rev. Temsü Jamir-i sangdong ka ajanga metetdaksü.

Tanü iba lokti ana ya Aortem asoshi tongtiban tongshi tulu ana lir. Kati ka den telungjem nung amalitepa inyaksü kangasa tongtiban shilem lir. Khuret aser temoatsü koba südir süang, arok meyong ta angatetba nung takok aser yimjung lir. Anungji, iba lokti ana ya Aortem tejakleni aotsü mesüra takok angutsü nükla yur shisa agütsütepa ajungshia inyaka aotsü nükjidong nung iba senden agia liasü.

Senden agiba mapang nung ABAM Executive Secretary, Rev. Temsü Jamir-i, Ao yimtsüngtem yimtok

küma jila balala nung aika timtema alirtem asoshi tebilemdangtsü, kechiba pei tasoli toktsür oteper? Litsü liküm aika odang arem kümdukja aliba asoshi asenoki kechi inyaktet? Tanü asen lima adena oa s h i s h i l e m b a r t e m sademsadema meinyaktetba asoshi asenoki teyari ola adoktsü koda? Nütsüng yongsük ajema akümba tebilemtsü, sentong balala amungba mapang nung tamanger ayak mesamai mungtettsü, Ao oshi koda renloka aotsü, Aor lokti ajaki kati ka nem akhüm agüja sentong achaayangtsü ta item onüktem tongtiban sa shisemba den ano ashiko tensa tia ajanga tesem balala nung Aor telok tentet aika tentettsü akok, saka Aor ayak mesamatsü asoshi Aor mendendi mamatoktsü asoshi iba meden yabo temaba nung wazüka ayutsü nüngdak, ta sensaksema liasü.

ABAM Executive Secre-

tary Rev. Temsü Jamir ajangasa Ao Sendeni sorkar den ochiba nung masüba temoatsütem nung onoki shilem magitsü, ta tasü itta ochi inyakba asoshi pelaba o lemsatepa liasü.

Rom tapu 13 nung ajemdaker Rev. Temsü-i, yimsüsürtemji Tsüngremi shimtetba, anungji asenok ajak ya Tsüngremi nungloktsüba mapa inyaktertem ta telungjem nung amalitepa temeim agi inyaksü ayongzüka liasü.

Tatem nung Wb. Marsanen Tir, Ao Senden ajanga asenoki telungjem indang kisüng jembiba nung makazüi joko ka akümba otsü jembitsüsa inyaksangshi sentong ajak nung ka kümer inyaka lidi, ta ayongzü.

Tsüngremi Aor asoshi shimtetba telok tongtiban ana yagi asen lima nung temelenshi aser temoatsü bener arutsü asoshi shisatsü meshia sarasadema atadi.

West Bank nung aliba yimtsüng ka nung Khristantemi teyari meshi

**July 16, 2025:** Tawa West Bank kübok Khristan yimtsüng, Taybeh kanga amakba atema Khristantemi Israel nungertem nem tai tongloktsür.

Iba yimtsüng nung alir Khristantemi teyari meshiba ama Yirusalem nungi Khristan lenirtem aser sorkar ketdangsertemi iba yim semdanga takoksa angurtem ajuruogo.

Jerusalem nung Latin Patriarch Pierbattista Pizzaballa-i, "Iba tesem nung anogo shia ozüng alema inyaker. Ozüngji tashi dang lir," ta ashi.

"Aibelenertem pua temerenshi agütsütsü atema Israel ketdangseremi bushisüngdangtsüla," ta Jerusalem nung aliba French Consul General, Nicolas Kassianides-i ashi.

West Bank nung Israel nunger million tesadangka shi lir, aser Israel nungertemi ozüng alema inyakba mapatemji United Nations-i

mita repranger.

July 1 nungi July 7 tashi nung Israel nungeri Palestine nunger anema inyakba tatalokba 27 liasü, ta UN Office for Coordination of Humanitarian Affairs (OCHA)-i metetdaksü.

Taybeh anasa yimtsüngtem nunga tesüiba hopta ana tsüngda Israel nungertemi nisung asem tepset aser tzü supply aika raksaja liasü.

July 7 nü Saint George Tenla ki rongdokja liasü. Iba Tenla ki ya Aso 5buba mapang nung asü aser yimdak iba Tenla ki dang anünga liasü, saka ibajia rongdoktsüogo.

Arogo nung Putir Basher Basiel-i, "Anogo shia onok jashidaktsütsüsa inyaker. Israel nungertemi parnok meyong kiset shiruru ajanga ali raksatsür aser lanur nisung tamajungertemi yim semdang," ta metetdaksü.

"Item ama tatalokba ya kodang ang anentsü?" ta pai

asüngdang.

Khristan lenirtem aser sorkar ketdangsertemi iba yimtsüng semdanga taraksatsübatem noksa aser video tangoka liasü.

Khristan yimtsüng amakba anema Hombarnü tesünep nung yimdong süa longkak aitba mapang nung parnoki, "Onoki tesünep aginer" ta ayimdena liasü.

Taybeh nung küm ti tashi mayor inyaker, Daoud Khoury-i tesemdangertem dang, Khristantem kümzüksü atema nenoki kechi inyakatet?, ta asüngdanga liasü.

Tesülen Khoury-i, "Kü tangatetba nungbo, parnoki kecha balaka meinyaktettsü. Iba tensa tamajungba dang akümba ajanga aikati iba tesem toktsür aotsü," ta ashi.

Arrshi küm 70 dak tema Khoury-i, "Yagi arua alir bendangertem (Israel nunger) matsüngdang onok tashi mali, ajisüaka nibo iba yim toktsür maotsü," ta metetdaksü.

ANO GO ABEN TSÜNGREM DEN

SHITAK BENDANGTETBA MIIM SHISATSÜ

*Israel nunger ajaki chuba obendangbaji angashia parnoki süngmang, kechiaser obendangisü, Tsüngrem shisatsi pa dak lir ta parnoki angu. 1Chubatem 3:28*

Tejen Lai mapang nung Solomon chuba shisa akaba ama shinga malias?....oda ne jakdang na mesüka tangar shinga malitsi mes?ra ne sülen na ama shinga madoktsü asoshi, ajiang, ni ne nem shisatsi aser tangatettsi mulungsentsü agütsüogo. 1Chubatem 3: 12

Kodang Solomon chuba asütsü nübur aika madak shimtet, pai Tsüngrem dang sarasadema meshibaji, "Anungji ne nübur telok tulu o bendang tajung-tamajung metetsü asoshi tangatetba mulungsentsü ne tenzüker nem kua, kechiyong ne nübur telok tulu ya shibai o bendangtsü akoktsü? Solomoni iba asüngdangba nung Kibuba temulung achi. Tsüngremi pa dang ashi, Kechiaser nai ya-ang asüngdang aser nai ne arishi talang asoshi mesüra na takar asütsü asoshi mesüra ne tsükchir taküm asoshi masüngdang, saka nai ochi obendangba angatettsüang asingdang; oda ne o ama ni inyakogo. Tek. 11-12a.

Temetetba aser shisatsü Tsüngrem nungi lir. Shibai Tsüngrem dang shisatsü aser temetetba meshir parnoki shitakba miim tangatetba aser shisa-rajemji angur. Solomoni Tsüngrem dang shisatsü dang meshi saka pai jenjang ajak iba ajanga ngutet. Rongsen nung pa kanga takar liasü. Yimli pai sünepa yimsü sütet, shingaia pa alema metutet aser pai Tsüngremer Yirusalem Tenla ki asü aser Tsüngrem mulung achiba pa den liasü

Temeimbatem, Tsüngrem nungi dang shitak bendangtetba shisatsü ngutet.

Syria nung Khristantem kümzüksü atema EU-i bangzüng agizük

**July 16, 2025:** Syria linük nung Khristantem densema minorities kümzüksü atema takhangba agüja European Parliament-i bangzüng ka agizükogo.

Taoba ita Damascus nung kiralongrartemi Mar Elias Greek Orthodox Tenla ki bomb amshia amakba tatalokba-a EU Parliament-i aitsü.

Damascus nung Tenla ki amakba lendong nungji nisung 25 pokseta liasü; iba ya Islamic kiralongrartem mapa asütsüa akok ta bilemer, ajisüaka karibo Syria security services züngsemtem dak melung malemer.

Tang Syria nung HTS sorkar lir. Iba telok ya al-Qaeda nungi jakzüka lir.

HTS-i Khristantem densema nütsüng ajema alirtem kümzüksü atema inyaker ta ashir, ajisüaka iba linük nung Khristantem anema inyakba kanga bulua akümer. Taküm March ita nunga Alawites nunger noklang aika tepseta liasü.

European Parliament-i Syria nung Khristantem kümzüksü atema takhangba agüja bangzüng renembaji Khristan advocacy group,

ADF International-ia pelaa agizükogo.

ADF International nung Global Religious Freedom Director, Kelsey Zorzi-i, "Iba bangzüng (EU Parliament) ya Syria nung Khristantem aser tanga minorities kümzüksü atema maneni ajungshiba bangzüng ka lir," ta ashi.

"Mar Elias Tenla ki amakba atema dang masü saka Syria nung yimsü nung ajemdaker reshikangshiba tatalokbatem atema aibelenertem nem temerenshi agüjang ta takhangba agütsütsü European Parliament dak temeden lir. Iba denji külemi Syria sorkari meimchir temeden atema inyakba maparen nung nungita yaritsüla," ta pai ashi.

Syria nung public sector aser private sector nung inyaker Khristantem bendangshidanga züngshiba atema tebilemtsü akar, ta ADF-i metetdaksü.

Syria nung Khristantem amokmerenba tatalokbatem kanga bulua akümer, anungji iba ya menokdangtetra mapang ka nungbo iba linük nung Khristan nütsüng samatsüa akok, ta ADF-isa metetdaksü.

## AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


### Terara

- (v) asojen ajung, akhüm taket (manly)  
\* Nisung asojen ajungba agi terara angur.

### Terara

- (adj) aika masü, ishishi (few, little)  
\* Onoki sen terara sarutepa timtemer nem agütsü.

## OLONG PAITEP # 7211



### TIPLÉN

1. Pei sasa ulua bilemba -6
5. Nisung aika -5
7. Tebang nungi adokba -3
9. Tatalokbatem metetpela -5
10. A \_\_\_ nu -3
13. Tebur kin-kidong merakasai jatepba -7
14. Ken atema meshia ata -3
16. Küm ka nung asortem -5
17. Songjen / Ajak -6

### LANGTSÜNGLEN

2. Shi alangsadak -10
3. Ita ter ana -3
4. Tangoka ayuba -5
6. Tebenja mali -10
8. Sü \_\_\_ ong -3
11. T \_\_\_ r -3
12. Hopta nung shilem ka -5
15. Süngdong nung shilem ka -3

## OLONG PAITEP # 7210 TELANGZÜBA

### TIPLÉN :

1. Tzüshi, 2. Saru, 4. Renlok,
7. Amos, 9. Zübi, 10. Teki, 11. Kija,
14. Anitet, 15. Süng, 16. Tepünü.

### LANGTSÜNGLEN :

1. Taremzü, 2. Sasa, 3. Rogo,
5. Labi, 6. Kichiba, 8. Shisatsü,
10. Teni, 12. Itsü, 13. Aong.

## NAI-A YA METETTER MA



### Mimlaba temzüng ozüngtem

Singapore ya temzüng ozüng kanga ajanga benokba atema ajaki jangja lir, aser temzüng ozüng karbo tangar dang nungi khenyongi balaka lir. Temzüng ozüng nüngutgu kaji chewing gum tenokdangba agütsüba ya lir, koba import asütsü mesüra ayoktsü memelar. Tanga temzüng ozüngtem rongnung ano kidang langsa mesenzütsü nokdangba densema lir. Iba den bendenloksema Singapore nung metzü memetsüba, jana intokba aser public toilets junga flush masüba atema senchi chia merenshiba densema lir. Tatemsa temelaba magi-i tangar Wi-Fi nung connect asüba ya-a Singapore nungbo temzüng ozüng alema lir.

## IAS Puneet Kumar Goel Manipur Chief Secretary kümogo



aser iba mapa atema Goel melenogo.

Centre-i Singh ya Manipur Chief Secretary mapa abentsü atema 2024 küm January 11 nü shima liasü. Iba masüdag pa Ministry of New and Renewable Energy Secretary liasü. Taoba Chief Secretary Vineet Joshi 2024 küm December 25 nü Union Higher Education Secretary asütsü shimba sülen pa transfer yoka liasü.

Manipur nung kin o kin tsüngda mangatetep adoker maneni mepetmesü tulu nung aliba mapang tang temaba jenjang nung lenirtem melentepogo.

2023 küm May ita nungi Meitei aser Kuki nunger tsüngda mangatetep adokba ajanga state mesüngjemteti arudar, aser tang tashi nung nisung 260 taküm samaogo aser nisung meyrejang aika pei talidak ki toktsür jenshiogo.

**Guwahati, Chiteni/July 16 (TYO):** Centre sorkari Bodhbarnü (July 16, 2025) IAS officer tejen Puneet Kumar Goel Manipur Chief Secretary asütsü shimogo. Pai Prashant Kumar Singh melenogo, ta Ministry of Home Affairs sangdong ka ajanga metetdaksü.

Goel, shiba AGMUT cadre nungi 1991-batch IAS officer ka

lir, pai Manipur cadre 1993-batch officer Singh melenogo, shiba tang National Commission for Scheduled Tribes indang Secretary kümogo.

Cabinet indang Appointments Committee-i, iba constitutional body atema Singh shimtsü asoshi July 15 nü temelaba agüja liasü. Pa tang Union Secretary indang rank aser pay scale nung tenzüksü

## OIL-i Namrup nung hydrocarbons ngutetogo

**Guwahati, Chiteni/July 16 (Agencies):** Assam Chief Minister Himanta Biswa Sarma-i Bodhbarnü sangdong ka ajanga, Oil India Limited (OIL)-i Dibrugarh district kübok Namrup Borhat 1 well nung hydrocarbon ngutetogo, ta metetdaksü. Iba well nung state sorkar indang stake-a aika lir.

Sarma-i, hydrocarbon ngutetba ya energy security aser Assam rongsenketzüng tashi itshitsü atema kanga tongtibang lir, ta ashi. Social media post ka ajanga Sarma-i, "OIL-i Namrup Borhat?1 well nung hydrocarbon aliba ngutetogo. Iba well nung Assam sorkar stake aika lir," ta ashi.

Paisa, iba terenlok ajanga totzü atutsü atema senotsü



intokba takok nguyonga aoba sayur aser iba ajanga national energy security atema teyari agütsür. CM-i, "iba ya ngutetba sülen Assam ya totsü adokdaksüba mezüngbuba sorkar kümogo, totzü bushitetsü merangba takok anguba sayur aser revenue o royalty ajanga Assam nem tashi tali agütsür,"

ta shisem. Sarma-i, iba ya state atema nemadangtsü mapang ka ta ashi.

Assam nung linük natural gas reserves shilem 12 lir aser linük indang onshore natural gas shilem 50 shi produce asür aser iba ajanga energy supplier ama tongtibang shilem agiba sayur.

## PAC meet atema Kharge, Rahul na Guwahati tongogo

**Guwahati, Chiteni/July 16 (Agencies):** Congress tir Mallikarjun Kharge aser Lok Sabha Leader of Opposition Rahul Gandhi na, party indang Political Affairs Committee (PAC) senden atema Bodhbhar anepdang Guwahati tongogo.

Assam Congress tir Gaurav Gogoi-i lenir anaprongla ya Guwahati airport nung agizüka liasü.

PAC senden den külemi Kharge aser Gandhi na Pradesh Congress Committee (PCC) ketdangpurtem, Members of Parliament, MLA aser Congress worker tem den senden balala amentsü.

Osangbenertem den senaksemba mapang Gogoi-i,

Assam nung Congress party-i, Bharatiya Janata Party (BJP)-i benokba tetsüba nung alirtem nem ochi obendang agütsütsü atema nokdaksü, ta ashi. Paisa, rishikashi tia nung alitem meraket atema party-i nokdangtsü ta tenangzüka agütsü.

Chief Minister Himanta Biswa Sarma-i aniba administration-i lisopurtem den tongtepratep mesüi Assam adena or aliba industrialist tem nem ozüng alema ali acre 17,000 shi agütsüba atema Gogoi-i parnok aija liasü. "CM aser pa kübok inyakertemi sensaksertem nungi ali rakzüker. Parnoki tribals aser lokti nung nütsüng agi ajema alirtem mintoker aser

Congress-i Assam nungertem ali temeden aser meraket kümzüka ayutsü atema raratsü," ta Gogoi-i ashi.

Mongolbarnü CM Sarma-i sangdong ka ajanga, sorkari ali atsünger alirtem ket nungi ali bigha 1,19,548 meyipa agiogo, ta metetdaksü. Paisa, pai aniba sorkari office mapa agizüka sülen arem aser national park ali atsünger aliba bigha 84,743 meyipa agiogo, ta jangjashitsü.

Trinamool Congress (TMC)-i, Assam nung BJP sorkar ya Bengali nungertem anema lir ta ashiba Sarma-i aitsüogo. Pai iba taitsüba ya ozüng alema arurtem kümzüka ayutsü atema tasa ka ta shia TMC aitsüogo.

# Ukraine-i Moscow bo mamaktsüla: Trump

**Washington, Chiteni/July 16 (Agencies):** United States Tir Donald Trump-i Ukraine Tir Volodymyr Zelenskyy dang pai long-range weaponry agütsü nung Kyiv-i Russia yimtiba maktettsü asü masü ta asüngdangba sülen paisa Ukraine-i Moscow mamaktsüla ta ashi.

US tiri Zelenskyy dang July 4 nü phone ajanga jembidang Russia litsü telung nung tali amaktsü ajungshi ta The Financial Times-i Mongulbarnü sangdongba sülen Trump-i mamaktsü ya ashi.

Iba sensaksemba junga meteta alir nisung ana athishia Trump-i Ukraine tir dang Moscow aser St Petersburg atongtsüsa nok-nü agütsüra nai amaktsü asü ta asüngdang, ta sangdong ajanga shia liasü.

Mongulbarnü White House nung osangbener temi Zelenskyy-i Moscow amaktsü-mamaktsü ta asüngdangba langzüdang pai mamaktsüla ta ashi. Trump-isa osangbener dang, onoki Kyiv nem longer-range missiles agütsütsü mejembir, ta ashi.

White House Press Secretary Karoline Leavitt-i media outlets balala nem agütsüba sangdong ka nung Trump aser Zelenskyy sensaksemba jangjatsü saka iba ojang ya bilemba ama masü tera meshidak jembir ta ashi.

"Tir Trump-i tasüngdangba ka asüngdanga liasü, tali tepsettsü ashir masü," ta Leavitt-i ABC News aser USA Today densema outlets kar nem sangdong agütsüba nung shia liasü.

Trump-i Ukraine nem nok-nü tali agütsütsü ta Hombarnü sangdong aser anogo 50 tsüngta peace deal ka meyanglura Russia indang trade partners dang secondary tariffs tesashi meshitsü amokmeren.

January ita White House-i meyipa shilangba sülen, Washington-i Ukraine yariba ya US rongsen agimaba dang lir aser yimjung yanglutsü merangba nung Zelenskyy-i tetsükdaktsü agütsür, ta Trump-i shijen shia aru.

Ajisüaka Russia Tir Vladimir Putin-i amakba anentsü asoshi jembishinütsü memulungba mechi US tir tezü tanga pa yimya melenshir.

Mongulbarnü Kremlin-ia, tawa Trump-i sanctions agütsütsü amokmerenba densema sangdong balala agütsüba ya kanga majung aser tensa asadangtsü mapang nüngdaktsü, ta ashi.

Ukraine tesem balala nung aliba yimti asem - Kharkiv, Kryvyi Rih aser Vinnytsia - nung tenük yoker Russia-i drones 400 aser ballistic missile ka khaloktsü, ta Ukraine indang air force ajanga ashi.

Meta talang nung kanga sashia amakba ya energy infrastructure nung tenük yokba lir, ta Ukraine Tir Volodymyr Zelenskyy-ia social media X nung ashi. Kryvyi Rih aser Dnipropetrovsk region nung kibong 80,000 indang power shibangtsü, ta Ukraine indang private energy company

tulutiba, DTEK ajanga Telegram app nung ashi.

Air force-i drones timba khazüka yok, saka targets 12 nung drones 57 aser missile yagi kongshi ta ashi.

Tang meyi mapang Ukraine yimti balala nung Russia-i asendenshir amaker aser drones noklang aika den ballistic missiles yoker. Yamai amakba yong air defence densema Ukraine nem nok-nü tali agütsütsü telemtetba agiogo ta US Tir Donald Trump-i hopta tetenzüklen shia lir.

"Russia-i par tasa memelenshir, aser tashi ita iba kiralongrar den tokteptsü asoshi asen defences tashi itshtitsü nüngdaker: air defences tali, interceptor (drones) tali, aseni telangzüba agütsüba Russia-i tali metettsü asoshi temulungtetba tali nüngdaker," ta Zelenskyy-i zülua liasü.

Vinnytsia aser temeket region nung nisung ti yiru, ta Ukraine indang interior ministry ajanga ashi. Polish Foreign Minister Radoslaw Sikorski-i social media X nung, drones temi Vinnytsia nung Polish wood flooring producer Barlinek Group indang factory ka nung kongshi ta ashi.

"Plant manager-i tangji kü dang ibai asaa amakba, tesem asemnen nungi ta shiogo... Putin indang criminal war ya asen arütsü anasai arur," ta pai ashi.

Kryvyi Rih nung military administration tekolakba Oleksandr Vilkul-ia Russian sepaitemi missile ka aser drones 28 amshia amak ta ashi.



OFFICE OF THE  
MERANGKONG SENSO JAMIR KIDONG TELONGJEM  
Merangkong, Pin - 798618  
Dist. Mokokchung : Nagaland

### Tenünsang Agütsür



Merangkong Senso Jamir kidong Telongjem Mendenti ajanga tenünsang ola ayimoktsür. Kidong züngsem tajung Wp. N. Temjen Jamir & Wt. Bendangmenla tena jabaso **Sp. Apangjungba** ajanga Political Science nung Ph. D (Doctor of Philosophy) Thesis-Political participation of woman in Nagaland; the role of customary laws and traditions Lovely Professional University Punjab nungi takok tulu ngua kidong aser yimer yimsanger nem temoatsü tulu bener arutsü nung kidong Mendenti ajanga tenünsang aser tetushi akatsür.

Tarutsü anogo nung tulusang Tsüngremi pa taküm maneni len aniangma ta sarasademsür aser dang nungi pa dang Dr. Apangjungba ta ajatsü tetemsü ta Merangkong Senso Jamir kidong telongjemi kuli akatsüba sangdonger.

**Sd/-**  
**M. Jongpongyanger**  
**President**

**Sd/-**  
**Tiawapang**  
**General Secretary**

## Gaza nung alibaGHFtesemnungnisung21ajemset

**Gaza City, Chiteni/July 16 (Agencies):** Gaza south tsütsü rongrong adoka ajemset, ta GHF aid distribution centre ka tenük kuli alir kati osangbener dang ashi.

Kasa mapang Nasser Hospital nungi medical source ka ajanga osangbener dang ashiba agi, kangasa yasa-tzüra alirtem chiyongtsü meshitsü meranga liasü saka teyari lema agütsüba indang main gate shibanger liasü.

"Israeli occupation forces aser centre indang private security personnel temi parnok dak inyang khaloktsü aser iba yongji nisung aika asü aser yiru," ta parnoki ashi.

May ita tatemlen Gaza Strip nung GHF lapokba sülen chiyongtsü meshitsü merangba mapang nisung 875 tepsetogo aser item rongnung nisung 674 asüba ya GHF sites temeket nung lir, ta United Nations ajanga ashir.

Asürtem timba dak prangbong agi akhaba zübu lir, ta UN rights office indang odongtar Ravina Shamdasani-i taoba hopta shia liasü.

Israel army aser GHF contractor temi nisung tepsetba mapa ya inyaker ta aitsür. UN-i GHF sites ya "death traps" lir ta ashir.

Al-Mawasi nung tesem balala nungi adenshia aliba camp ka nung Israel-i amakdang nisung toku tepsetba mapang teyari agütsüba tesemtem anasa nisung asüba osang ya angashir.

Bodhbarnep anü adoker iba osang züluba mapang tashinung Palestine nunger 43 shi tepsetogo aser yangji teyari bushir nisung 21 dena lir, ta medical osangtem ajanga ashir.

Gaza nung alibaGHFtesemnungnisung21ajemset

**Gaza City, Chiteni/July 16 (Agencies):** Gaza south tsütsü rongrong adoka ajemset, ta GHF aid distribution centre ka nung Palestine nunger nisung 21 tepsetogo aser parnok ya timba ajemsetba lir.

Mangatettep aliba United States aser Israel-i yariba organisation ajanga Khan Younis nung Bodhbarnep atalokba lendong ya nok-nü bener longkak aiter tai lir ta aitsüba Gaza indang Ministry of Health-i magizüker.

Bodhbarnep sangdong ka nung, rongrong tulu adoka nisung 19 ajemset aser ka tsüngset, ta GHF ajanga shia liasü.

Kuli tejangja mesayuteti iba lendong ya Hamas den sensaktepa alirtemi iba telok nungi tezükdaktsü, ta ashi.

Telok nung nok-nü balala bena aliba GHF staff temi angu aser US contractors ka prangbong agi amokmeren, ta sangdong ka ajanga ashi.

Ajisüaka Palestinian authorities aser tenük kuli alirtemi GHF sangdong ya aitsü.

Gaza indang Health Ministry ajanga sangdong ka agütsüba nung, Palestine nunger nisung 21 ya Bodhbarnü GHF site nung tepset ta ashi.

Teyari bushirtem dak tear gas khaloktsüba sülen nisung 15 ajemba aser tangola mesashitetba agi asü ta parnoki ashi.

"Teyari lema agütsüba tesemtem nung tangola mesashitetba aser nungtepba mapang nisung asüba tang mezüngbuba kuli lir," ta ministry ajanga ashi.

Lokti adenshia alidak tear

**GOVERNMENT OF NAGALAND**  
**DIRECTORATE OF TECHNICAL EDUCATION**  
**NAGALAND, KOHIMA**

NO.DTE/ESTT-24/2020-21/  
/Dated, Kohima the 16thJuly'2025.

**NOTIFICATION**

Incontinuation to this OfficeNotification of even number dated 23rd May 2025, corrigendum dated 26th May 2025, and in pursuance to Government Approval No.HTE/TE/43-4/2024 dated 1st April 2025, and as per the recommendation of the committee for temporary engagement of the Lecturers, Demonstrator and Instructor under Government Polytechnics, the result has been declared based on the merit of academic marks, subject knowledge, interview marks shown below:

The selected candidates are informed to submit the acceptance letter to the undersigned on or before 21st July, 2022. Failing to submit the same on time shall amount to cancellation of the selection and the same shall be replaced by the waiting list candidate.

| Sl. No. | Name of Post                  | No. of post | Name of Candidates    | Remarks        |
|---------|-------------------------------|-------------|-----------------------|----------------|
| 1       | Lecturer in Civil Engg.       | 1 (one)     | 1 VISEVOTO VITSO      | Recommended    |
|         |                               |             | 2 VIKUOBEITUO KELIO   | waiting list 1 |
|         |                               |             | 3 ELIZABETH B KHUVUNG | waiting list 2 |
| 2       | Demonstrator in Civil Engg.   | 1 (one)     | 1 TIAMONGLA           | Recommended    |
| 3       | Lecturer in EEE               | 1 (one)     | 1 MEDEMRENLA TZUDIR   | Recommended    |
|         |                               |             | 2 JESSICA Z SWU       | waiting list 1 |
|         |                               |             | 3 KEVITHUTO KECHU     | waiting list 2 |
| 4       | Demonstrator in EEE           | 3 (three)   | 1 KEVITHUTO KECHU     | Recommended    |
|         |                               |             | 2 RAZOTO VESWUH       | Recommended    |
|         |                               |             | 3 NUKUVOLU KEYHO      | Recommended    |
|         |                               |             | 4 MEDEMRENLA TZUDIR   | waiting list 1 |
|         |                               |             | 5 JESSICA Z SWU       | waiting list 2 |
|         |                               |             | 6 KHRIESAVITO CHUTSO  | waiting list 3 |
|         |                               |             | 7 TUMBEMO N SHITIRI   | waiting list 4 |
|         |                               |             | 8 KHRIESAVITO CHUTSO  | waiting list 5 |
|         |                               |             | 9 T MHARHONI TUNGOE   | waiting list 6 |
| 5       | Instructor in Electrical shop | 1 (one)     | 1 JESSICA Z SWU       | Recommended    |
|         |                               |             | 2 KEVITHUTO KECHU     | waiting list 1 |
|         |                               |             | 3 MEDEMRENLA TZUDIR   | waiting list 2 |
| 6       | Lecturer in Mechanical Engg.  | 1 (one)     | 1 IRENE KEMP          | Recommended    |
|         |                               |             | 2 PHILIP TEP          | waiting list 1 |
|         |                               |             | 3 EJEMARIAM NGIYESHU  | waiting list 2 |
| 7       | Instructor in Machine shop    | 1 (one)     | 1 PANGAI T KONYAK     | Recommended    |
|         |                               |             | 2 KHEKIHO N CHOPHI    | waiting list 1 |
|         |                               |             | 3 WEENEI AKAMI        | waiting list 2 |
| 8       | Lecturer in Physics           | 1 (one)     | 1 KEDO YHOSHÜ         | Recommended    |
|         |                               |             | 2 CHANGKUMLA C        | waiting list 1 |
|         |                               |             | 3 MAPUSOLA IMSONG     | waiting list 2 |
| 9       | Demonstrator in Automobile    | 1 (one)     | 1 NOGHICHU THONG      | Recommended    |
|         |                               |             | 2 KUTO CHUZHÖ         | waiting list 1 |
|         |                               |             | 3 JOHN N CHANG        | waiting list 2 |

NB: The waiting list will be valid for 2(two) months.

(Er. VIPULHOU LHOUNGU)  
Director

## JAPAN OPEN: PV Sindhu tsükogo; Satwik-Chirag, Sen 2buba round-i iogo



**Chiteni/July 16, 2025**

**(Agencies):** Tang asaya aliba Japan Open nung Bodhbarnü Olympic nung medal ana ngur alila PV Sindhu maneni mezügbuba round nung tsükogo, saka tebur kija asayar Lakshya Sen aser tebur tarep asayar Satwiksairaj Rankireddy aser Chirag Shetty nungerberbo tanabuba round-i iogo.

Arishi küm 30 tain Sindhu, shiba taoba mapang world champion ka lir lai mezügbuba round nung Korea tsür Sim Yu Jin 15-21, 14-21 agi mekoki liasü. Iba asayamung densema la taküm mezügbuba round nung pongubenbuba tsükogo.

Ajisüaka Satwik-Chirag aser Lakshya nungeriibo pei tata asaya straight game nung kokogo.

Asaya kanga meyilongi

tenzükba sülen Sindhu-i aibelen aika mena aser iba den shuttle junga masadangteti asaya. Mezügbuba game nungbo lai merangdangba sayuogo, saka Sim-i asaya amokbanger asaya-a la indang career nung tang mezügbuba Sindhu madak takok nguogo.

Tanabuba game nung yakta dang Sindhu 1-6 agi tesülen aküm. Lai point 11-11 tashibo menepetepa asaya saka Korea tsürla yagi tajungba asaya-a straight games nung dang asaya koka liasü.

Tebur tarep asaya nung Satwik aser Chirag nati Korea nung tarap Kang Min Hyuk aser Kim Dong Ju na 21-18, 21-10 agi minute 24 nung dang koka liasü.

Mezügbuba asaya tetenzüklenbo Korea nung

tarep yagi tena den toktepa asaya saka mapang tatsük dang lir Satwik aser Chirag nati asaya amokbanger asaya tenzük aser asaya ayong ayonga koka liasü.

Satwik-Chirag na tanabuba round nung fifth-seeded tarep Liang Wei Keng aser Wang Chang na den asayatsü akok.

Kasa mapang nung Lakshya shiba taküm junga masayateti arudar, pai mezügbuba round nung China nung asayar Wang Zheng Xing 21-11, 21-18 agi kokogo. Pa taküm asayamung aika nung mezügbuba round nung tsükogo, saka iba asayamung nungbo takok ngutetogo.

Lakshya taruba round nung seventh seed Japan nung asayar Kodai Naraoka den asayatsü.

## Marti Cifuentes Leicester City manager kümogo

**Chiteni/July 16, 2025**

**(Agencies):** Leicester City-i first team manager asütsü Marti Cifuentes shimogo, shibai Ruud Van Nistelrooy melenogo. Arishi küm 43 tain coach yagi club den küm asem atema tenangzüktepba yangluogo.

Marti nem assistant manager Xavi Calm-i teyari agütsütsü. Tena Championship nung Queens Park Rangers nunga külemi inyakogo.

QPR nung kanga takok ngua inyakba sülen Calm tang Leicester nung denogo. Pa 2023 küm October ita QPR indang coach aküm aser par team Championship relegation zone nung aliba nungi jenjang 18buba tonga ani. Iba season par team-i tatembangbuba asaya ti nung asaya pongu koka jenjang junga aküm.

"Leicester City Manager asütsü shimba ya tetushi tulu lir. Iba ya club tajung ka aser club yaritsü atema asüngdangba ya maongka ka lir. Ni asayartem den metetpelatsü aser club pusemertem aser yimti den

sendakteptsü yongya atar," ta Cifuentes-i ashi.

England-i oa mapa minyak tsüngda Catalonia nung asoba coach ya Sweden nung Hammarby IF nungi kanga takok ngua inyaka pai aniba team ya Swedish Cup final aser European qualification tonga ania liasü. Paisa, Norway nung Sandefjord nungi kanga takok ngua inyaka club indang style aser asayaba yimya melenshija liasü.

Marti ya taoba mapang Spain, Netherlands, Denmark, aser UK nung coach mapa inyakogo aser iba ajanga pa nem tajangshiba tajung aika agütsüogo.

Leicester City mendenbuba Aiyawatt Srivaddhanaprabha-i, "Martí Leicester City-i pelashishia jaoker. Coach tasen shimtsü atema inyaktepba mapang pa tashi, nükjidong aser pai inyaknubatem tejangja aliba ajanga pa tangar dang nungi balaka kümdaktsü. Pa club-i anir aruba ajanga kümtem tsüngda ajaki aginüba ama takok nguyonga aotsü atema teyari agütsütsü imlar," ta ashi.

## Test Batter tem rongnung Root maneni temaba jenjangi tuogo

**Chiteni/July 16, 2025**

**(Agencies):** Bodhbarnü sayaba ICC Test rankings nung England nung nungtugu batter Joe Root maneni batter tem rongnung temaba jenjangi tuogo aser kasa mapang nung Ravindra Jadeja 34bubai tuogo.

Lord's nung India team run 22 agi akokba asaya nung Root-i innings ana nung run 104 aser 40 yanglua liasü. Arishi küm 34buba nung pa ya Kumar Sangakkara (37) sülen No. 1 Test batter tem rongnung tambusang kümogo. Root ya hopta ka tejakdang külem England nung asayar Harry Brook-i ajatet liasü, shiba tang Kane Williamson sülen tasembuba jenjangi luogo.

India nung batter tem rongnung opener Yashasvi Jaiswal aser vice-captain Rishabh Pant na tang jenjang pongu aser tibuba nung lir aser captain Shubman Gill-a tekububai asepzüka luogo.

Ajisüaka Jadeja bo jenjang pongu tejakdang tua tang

34buba nung lir. Pai Lord's nung run 72 aser out mesür run 61 yanglua liasü. KL Rahul shibai kasa asaya nung run 100 aser 39 yanglua liasü, pa jenjang pongu tejakdang tua tang Jadeja sülen 35buba nung lir.

Bowler tem rongnung Jasprit Bumrah maneni temaba jenjang nung lir. Pa South Africa nung bowler Kagiso Rabada dang nungi point 50 agi timba lir.

Australia nung bowler Scott Boland-a jenjang trok tejakdang tua tang trokbuba nung lir. Bowler tem rongnung top ten nung Australia nung bowler Pat Cummins, Josh Hazlewood, Nathan Lyon aser Mitchell Starc nungera lir.

1958 küm top 12 nung England nung bowler trok aliba sülen tang mezügbuba Australia nung bowler temi Test bowling rankings amokbanger lir.

India nung all-rounder Washington Sundar-a jenjang 58buba nungi 46bubai tuogo.

## Everton aser Mark na enangzüktepba yanglu

**Chiteni/July 16, 2025**

**(Agencies):** Everton aser goalkeeper Mark Travers na küm pezü atema tenangzüktepba yangluogo aser pa club nungi 2029 küm June ita tashi asayatsü.

Arishi küm 26 tain Republic of Ireland nung international asaya ya Bournemouth nungi arua Everton nung aden kong pa küm teku asaya liasü.

Evertontv den jembiba mapang Travers-i, "ni Everton asayar ka akümba atema kanga pelar aser nema adanger. Idaki aruba sülen club ya koda tulu aser puti otsü koda takar aji jangjar. Nai fanbase ya tali jangjar aser club koleni odar aji tali jangjar," ta ashi.

"Kü atema iba ya tetenzük tasen ka aser career nung tapak tasen ka lapokba asütsü.

"Tang iba club nung adentsü ya jangrademtsü mapang ka lir aser ni asayatsü matateter.

"Telok tasen den inyaktsüji teti jangrademtsüka aser lanur asayartem nem teyari agütsüji jangrademtsüka lir. Ni takokba tashi meranga asayatsü. Ni ground telung aser tema nung kechi shitak aji inyaktsü meranger aser nema danga iba club tenüng nung asayatsü," ta pai ashi.

Travers ya Bournemouth nungi 82ben asayaogo aser pa Weymouth, Swindon Town, Stoke City, aser Middlesbrough nung nungi loan nung oa asayaba mapang tajangshiba aika nguogo. Pa ya 2024/25 Championship campaign nung tanabuba shilem nungbo Middlesbrough indang No.1 keeper liasü aser league asaya

20 asaya liasü.

Club career dak alaka pa ya Republic of Ireland team nungi 2019 küm September ita nungi asayadar aser tang tashi nung pezüben asayar lir. Travers senior international asaya nung mezügbuba 2019 küm September ita 10 nü Bulgaria den asaya liasü. Parnoki iba asaya goal 3-1 agi akok.

Travers ya Ireland tenüng nung under-15 nungi under-19 youth level tashi asayaogo aser senior national team atema mezügbuba 2019 küm March ita jaoka liasü. Pa ya Denmark aser Gibraltar den 2020 European Qualifiers asayatsü atema Republic of Ireland senior squad nung züngoksema liasü.

Midfielder Charly Alcaraz aser striker Thierno Barry na alizükba sülen Everton-i tang asayar tasembuba alizükogo.

## BILEMDANGANG

**"Nisung ka terenlok atema takok aser tamakok naprongla tongtibang."**